

大同縣志卷十三

宦績

官師志惟令丞教尉登載姓名蓋縣志之體例然耳而前明設官則有巡撫有僉議有兵備道副使與鎮將諸大僚俱同此一城

國初尚因之數百餘年其勳在社稷澤被生民者今日猶將尸祝之勿替也况有以死勤事以身殉國史冊記載昭然脫佚而不傳豈足爲此邦之興要也乎茲以事實之不容泯者各錄本傳彙集成編總之曰宦蹟不特考古者藉資証覽且以見捍衛中原惟北門之鑰之重賴於得人也已而古今令丞之有治行者

大同縣志

卷十三

宦績

一

採其美績同爲一卷要皆古之遺愛者乎

孫德謙河南睢州人任中書省歷大同行省平章事明兵旣克大都元主已北行徐達遣將圍大同德謙嬰城固守自知力不能支乃手書自決作詩數章詞義激烈城陷不屈死

陳質建文初以叅將守大同中軍都督同知助宋忠保懷來忠敗退守大同代王欲舉兵應燕質持之不得發燕師攻大同堅守不下蔚州廣昌附於燕旋復取之永樂初被害

鄭亨合肥人嗣大興左衛副千戶靖難兵起從破紫荆關掠廣昌取蔚州直抵大同封武安侯仁宗初拜征西前將軍鎮大同墾田積穀邊備繕完自是大同希寇患宣德間再鎮大同轉餉宣

府招降酋長四十九人請于朝厚撫之歸附者相屬九年卒亨嚴肅重厚善撫士恥培克大同鎮守中官撓軍政據理裁正其人不少悅然其卒也深悼惜之贈漳國公諡忠毅

羅亨信字用實東莞人永樂二年進士官德中爲御史清軍山西有聲有薦其堪方面者命食按察僉事俸待遷正德中以右僉都御史巡撫宣府大同汰諸衛冗官老弱者四百八十餘人叅將石亨請簡大同民三之一爲軍亨信奏止之晉右副都御史巡撫如故時遣官度二鎮軍田一軍八十畝外悉徵稅五升亨信言永樂時詔邊軍盡力墾田毋徵稅陛下復申命之今奈何忽爲此舉塞北諸軍防邊勞苦無他生業惟事田作每歲自冬

大同縣志

卷三

宦績

二

祖春迎送瓦剌使臣三月始得就田七月又復刈草八月以後修治關梁計一歲中曾無休暇况邊地磽瘠霜早收薄若一收稅則民不復耕必致竄逸上納其言景泰初晉左副都御史致仕卒

郭登字元登武定侯英孫好談兵工詩明武將無及者正統十四年上爲北征扈從至大同拜都督僉事充叅將佐總兵官劉安鎮守及旋師登告學士曹鼐等駕宜入紫荆關王振不從遂及於敗時大同軍壘蕭條城門盡閉人心洶洶登慷慨奮勵修城堞繕兵械撫循士卒弔死問傷親爲裹創傳藥曰吾誓與此城共存亡矣也先擁駕至閉門不納英宗遣人謂登曰朕與登有

如何拒朕若是登奏曰臣奉命守城不知其他景帝初晉都督同知充副總兵尋代安爲總兵官也先入將所部入援先馳蠟書奏至敵已退上褒答之晉右都督却敵城下上用兵方畧十餘事景泰元年春敗敵於沙窩以八百騎破數千人封定襄伯四月又敗寇於土城六月再却寇鎮守中官陳公與登構上遣人代公還登愈感奮及英宗還代王頌登功云有自敵中來者言其初計欲取大同爲巢穴故數來攻及每至輒敗有一營數十人不還者敵氣懾遂奉駕還乞降勅獎勞兵部言登已封伯乃止二年以老疾乞休舉石彪自代不許時沈固在大同久事多廢登劾奏之而薦尚書楊寧布政使年富又言大同既有

大同縣志

卷三

宦績

三

御史又有巡按御史僉都御史任寧宜止巡撫宣府上悉從之遂以富代固而徹固及寧還總兵孫鏗與登互訐詔切責鏗已勅登與鏗兩戒之秋以疾召還成化中提督十二團營卒贈侯諡忠武登爲將兼習勇紀律嚴明料敵制勝動合機宜詳武事霍瑄字廷璧鳳翔人繇鄉舉入國學授大同通判用薦就擢知府也先擁英宗至城下瑄與理翰侍郎沈固等出謁奉命括金帛充犒固悉所有獻之已而復至郭登戒嚴弗應瑄號泣從水竇匍匐出叩馬鳴咽衆露刃叱之不爲動因獻英宗服物出金帛犒軍英宗嘉歎密諭瑄與登堅守瑄遣也先數出沒大同渾源伺軍民樵采脫歸者率傷殘瑄具爲奏老弱聽暫徙發粟賑而

所留城守丁壯除賦役秩滿當遷鎮巡諸臣乞留詔加山西右叅政仍治府事英宗復位德瑄及固徵拜瑄工部右侍郎而固亦以石亨薦起爲戶部尚書旣而巡撫上瑄治行賜誥旌異瑄在大同時巡撫年富被逮瑄資其家還里爲鎮守太監韋力轉所惡撻之十餘瑄至是以聞且言力轉每宴輒用妓樂服御僭侈強取部民女爲妾力轉被逮訐瑄上兩釋之瑄後致仕卒年富字大有懷遠人本姓嚴後訛爲年以會試副榜注銓景泰二年爲右副都御史巡撫大同提督軍務時經喪敗法度廢弛叢弊尤甚富一意捫循奏免秋賦罷諸州縣稅課局停太原民之轉餉大同者武清侯石亨武安侯鄭宏武進伯朱瑛令家人領

大同縣志

卷三

宦績

四

官庫銀帛糴米實邊多所乾沒富首請按治詔宥亨等抵家人罪亨慮久雨壞關城潛遣卒十餘人行視卒遂越關抵大同富復劾亨專擅亨輸罪已削襄垣王府菜戶又杖其厨役之署教授事者已又劾分守中官韋力轉叅將石彪及山西叅政林厚罪豪家愈側目相與撫富罪巡按御史白其誣遂不問當是時富威名重天下而當事大臣于謙等力保持之故得行其志母憂詔乘傳奔喪起復視事七年富上言往時諸邊雖設鎮守監鎗內官其數猶少自土木變後諸邊悉增如陽和天城諸處一城二人擾民殊甚今邊務稍寧請減汰格不行又言洪武定制軍官私罪收贖惟笞則然杖卽降授徒流俱充軍律明甚今屢

變更犯賊者輕皆復職重惟立功刑不足懲更無顧憚此皆法官過也於是廷議流徒輸贖如故惟于本衛差操不得復領軍矣英國公張懋及鄭宏各置田莊于邊境歲役軍耕種富劾之還軍于伍天順元年革巡撫官富亦罷歸頃之石彪以前憾誣劾富逮下詔獄李賢稱富能祛弊上曰此必彪爲富抑不得遂其私耳已而事果無驗令致仕後召任戶部尚書卒諡恭定

余子俊字士英青神人景泰二年進士成化二十年以戶部尚書太子太保兼左副都御史總督大同宣府軍務冬還朝二十一年復出行邊先是子俊巡撫延綏東起清水營西抵花馬池延袤千七百七十里咸鑿崖築牆掘塹其下連續不絕每二三里

大同縣志

卷十三

宦績

五

置敵臺崖砦爲巡警之所又於崖砦空處築短牆橫一斜二如箕狀以瞭敵避射凡築城堡十一邊墩十五小墩七十八崖砦八百十九役軍四萬人不三月而城牆內地悉分屯墾及巡歷宣大請以延綏邊牆法行之宣大因歲歉而止比復出銳欲行之言東起四海石西抵黃河延袤千三百餘里舊有墩百七十應增築四百四十墩高廣皆三丈計役夫八萬六千數月可成詔明年四月卽工而歲比不登上下難之子俊又欲責成於邊臣而已不親其事謗議遂起至冬疏請還改左都御史巡撫大同中官韋敬讓子俊假修邊多侵耗命工部侍郎杜謙勘之敬又劾子俊私恩怨易將帥下兵部覈侍郎阮勣等爲白命謙并

按問而中朝多欲傾于俊子俊危甚謙還奏易置將帥如勤等
言所費無私然爲銀百五十萬米菽二百二十萬二十二年二
月遂落太子太保致仕去二十三年上悟于俊無罪而修邊功
不可泯復召爲兵部尚書宏治二年卒贈太保諡肅敏子俊嘗
曰大臣謀國當身任利害豈得遠怨市恩爲自全計其所修邊
垣迄爲數世利云

李敏字公勉襄城人景泰五年進士成化時歷山西右布政使累
擢右副都御史巡撫大同敵騎出沒塞下掩殺墩軍敏伏壯士
突擒之修治垣塹敵不敢犯大同居極邊孔廟無雅樂敏上奏
獲頒賜焉居三年召爲兵部右侍郎累遷戶部尚書先是敏在

大同縣志

卷十三

宦績

六

大同見山東河南轉餉至者道遠耗費乃會計歲支外悉令輸
銀民輕齎易達而將士得以其贏治軍裝交便之至是并請畿
輔山西陝西州縣歲輸糧各邊者每糧一石徵銀一兩以十九
輸邊依時值折軍餉有餘則召糴以備軍興上從之自是北方
之稅皆折銀絲敏始也宏治四年歸卒贈太子少保諡恭靖
謝綬字朝章朝城人成化甲辰進士授任邱令歷陞都察院右僉
都御史巡撫大同時也先旃廬百餘里葆聚塞下數入侵盜綬
至鎮簡練軍實墾田殖穀威名流聞部落遠徙不敢近塞又設
伏險阨寇騎零抄出入輒要擊之日對將吏商軍務方晷夜治
文書按圖籍指畫山川險易及寇中曲折皆如身履好撫卹士

卒調給芻糧燕犒無不周至屢奉璽書褒美以勞成疾卒於軍府訃聞詔守臣臨祭如法

洪漢字天章號雲一成化壬辰進士任部曹甚風厲歷陞右副都御史巡撫大同叅贊軍務撫卹軍民搜剔蠹弊風紀振而邊境肅然上疏極言便益地方八事而增守備以專責任演神機以期實用置方田以遏北騎寬住俸以惜逃官尤爲八事中切要者因觸忤中官回籍

劉大夏華容人倣儻有大畧持正不撓宏治十年大同行師乏糧大夏以戶部侍郎出經畫之或曰北邊糧草半屬京貴子弟公剛介此行恐取禍大夏曰處天下事以理不以勢定天下事在

大同縣志

卷十三

宦績

七

近不在遠候至彼圖之旣至詢咨父老得其要領揭榜通衢云某倉缺糧若干石每石給官銀若干凡境內外官員客商願輸者米自十石以上草自百束以上聽卽中貴子弟不禁也不兩月倉場有餘積家有餘財邊事賴之尋爲兵部尚書卒諡忠宣馬隆陝西中部人正德間任大同府推官性沉毅執法如山然廉平不苛無滯獄後戍卒變將鼓噪入于府隆挺身往亂卒聞隆至皆寂然退就伍無敢譁者

蔡天祐字成之睢州人宏治末進士累遷山西按察使嘉靖三年八月大同兵亂巡撫張文錦遇害詔曲赦亂卒擢天祐左僉都御史代之天祐從數騎馳入城諭軍士獻首惡衆心稍定會尚

書金獻民總兵官杭雄出師甘肅道大同亂卒疑見討復鼓噪
天祐懼急請再赦兵部議除元惡特遣大臣總督宣大軍務乃
命戶部侍郎胡瓚偕都督魯剛統京軍三千人以往瓚等未發
而進士李枝齋餉銀至亂卒曰此承密詔盡殺大同人爲軍犒
也夜甲火起圍枝館出牒示之乃解尋復殺知縣王文昌圍代
王府脅王奏乞赦王急携二郡王走宣府巡按御史王官言亂
卒方囂大帥兵壓境是趣之叛也請急止禁軍容臣密圖乃命
瓚駐兵宣府頃之天祐奏總兵官桂勇已捕五十四人請止京
軍勿遣上責以阻撓令必獲首惡郭鑑等旣而瓚次陽和勇天
祐令千戶苗登擒斬鑑等十一人函首送瓚請班師甫二日鑑

大同縣志

卷十二

宦績

八

父郭疤子復糾徐瓊兒等夜殺勇家人又燬苗登家瓚言非盡
殲不可上乃切讓天祐召勇還京以故總兵朱振代之勅瓚仍
駐宣府無何天祐捕戮徐瓊兒等瓚遂班師明年正月總兵官
馬永等言疤子潛逃塞外將遣勘會瓚還言逃卒無尾患乃罷
勘疤子復潛入城夜焚振第明日天祐閉城大索獲其黨三十
四人悉斬以殉盡宥脅從人心大定事聞賚銀幣晉副都御史
巡撫如故尋就晉兵部左侍郎召還部歸卒天祐有才智兵變
時左右皆賊耳目天祐廣招星卜藝士往來軍中因具得其情
卒賴以成功在鎮七年有威德父老立安輯祠

何棟字伯直號太華長安人正德辛巳進士博綜羣籍篤嗜數學

商摧古今如指掌厯陞都察院左僉都御史巡撫大同是時彗星見於井之末度爲大同分野棟考索象緯圖經疏言彗色蒼赤期年後當有圍城蹶將之災至鎮申嚴紀律拊循營伍寇入高山站選將厲兵俘四十九級邊境肅然未幾左遷四川叅議後晉右都御史兵部左侍郎乞休

毛伯溫字汝厲吉水人正德三年進士嘉靖中累官大理寺丞李福達獄起坐失入褫職起右僉都御史巡撫山西未赴十八年二月上幸承天詔總督宣大山西軍務大同鎮邊鎮川宏賜鎮河鎮魯五堡相距二百餘里極邊自巡撫張文錦以築堡致亂後無敢議修者伯溫曰變所繇生以任用匪人非建議謬也卒

大同縣志

卷十三

官績

九

營之募軍三千防守給以閒田永除其賦邊防賴焉錄功加太子少保閏七月南征安南後爲兵部尚書削籍卒天啟初追諡襄懋

詹榮字仁甫山海衛人嘉靖五年進士以戶部郎中督餉大同值兵變殺總兵官李瑾總督劉源清率師圍城久不下榮素有智畧善應變叛卒掠城中無犯榮者外圍益急榮密約都指揮紀振遊擊戴濂鎮撫王寧同盟察叛卒馬昇楊麟無逆志乃陽令寧持官民狀詣源清所爲叛卒乞原而陰以榮謀告請宥昇麟死昇三千金俾募死士自効會源清已罷巡撫樊繼祖許之昇麟遂結心腹擒戮首惡黃鎮等九人榮乃開城門延繼祖入復

捕斬二十六人錄功擢光祿寺少卿後遷右僉都御史巡撫甘肅二十三年以大同巡撫趙錦與總兵官周尚文不相能詔榮與錦易任俺答數萬騎入掠榮與尚文破之黑山陽晉右副都御史寇復大舉犯中路參將張鳳等陣沒榮與尚文及總督翁萬達嚴兵備陽和而遣騎遙擊多所殺傷寇乃引去代府奉國將軍充灼行剽榮奪其祿充灼等結小王子入寇謀據大同榮告尚文捕得皆伏辜又築東路邊牆設墩堡請名軍佃作寇再人犯與尚文破之彌陀山斬一部長榮先以靖亂功晉兵部左侍郎又以繕邊破敵累被獎賚召還理部事閒住卒當榮撫大同與總督萬達總兵尚文皆有才畧寇數入不能得志萬歷中

大同縣志

卷十三

宦績

十

贈工部尚書

黃綰字宗賢黃巖人孔昭孫也承祖廕以議禮任詹事又拜禮部左侍郎大同軍變殺總兵官李瑾據城拒守總制侍郎劉源清提督卻永議屠之百道攻城中恟懼外勾寇爲助塞上大震巡撫潘倣請止兵源清力詆倣大學士張璉及廷議並右源清綰獨言非策及源清罷侍郎張瓚往代未至而郎申詹榮等已定亂亂卒未盡獲軍民瘡痍甚代王請遣大臣綏輯之乃特以命綰且令察軍情勘功罪得便宜行事綰馳至大同宗室軍民牒訴官軍暴掠者以百數無告叛軍者綰一無所問以安其心有爲叛軍使寇歸者綰執戮之反側者復相煽綰大集軍民曉以

禍福罹害者陳牒佯不問而密以牒授給賑官按里核實一日捕首惡數十人卒尚欽殺一家三人懼不免夜鳴金倡亂無應者遂就擒緝復圖形購首惡數人軍民不復虞誑誤乃令有司樹木柵設保甲四隅創社學教軍民子弟城中大安還朝列上文武將吏功罪極詆源清永二人卒被逮絀以勞增俸一等後起禮部尚書兼翰林學士歸卒

侯鉞字義甫東阿人金丞相摯之後嘉靖辛丑進士魁岸有大度論事侃侃由工部郎中出爲山西屯田僉事有詔築龍門邊五百里衆以寇所出入相顧莫敢往鉞獨以身任之一日寇大至左右請入城避答曰吾舍數萬丁夫獨先安往乃驅民入城身

大同縣志

卷十三

宦績

七

爲之殿擢山西副使整飭陽和兵備大將軍仇鸞行邊司道皆伏謁鉞獨長揖不伏鸞初不悅及與語縱橫指畫旁若無人鸞奇其才謂軍門曰此中嶽嶽侯君一人兵備三月拜右僉都御史巡撫大同致仕歸常與田夫漁父揮鋤分畝相娛樂過者不知其爲故中丞也

楊博字惟約蒲州人嘉靖八年進士三十五年代許論爲兵部尚書博未終父喪疏辭而上以大同右衛告急改博總督宣大山西軍務博墨線馳出關未至侍郎江東等以大軍進右衛圍六月守將王德戰亡芻粟且盡士死守無二心博厚加褒卹奏行善後十事以給事中張學顏言留博鎮撫奏蠲租因僉其丁壯

爲義勇分隸諸將造偏箱車二輛令習車戰又以大同牆圮善治爲急次則塞銀釵驛馬諸嶺以扼紫荆路於大同牛心山諸處築堡九墩臺九十二接左衛高山站以達鎮城濬大壕二各十八里小壕六十有四五旬訖功賜勅獎資加太子太保留鎮如故博先後數出奇兵並議築故總督所創邊牆招民千六百餘人又請通宣大荒田水利薄其租報可旋移薊遼總督後晉吏部尚書少師致仕

江東朝城人由進士累官兵部右侍郎嘉靖三十五年總督宣大軍務甫抵任烽警大作東選銳士戰却之名還部視事三十七年春大同右衛圍急數月餉道不通復以東總督軍務設策得

大同縣志

卷十三

宦績

十三

通餉城中士氣百倍選集主客兵數萬圍乃徹東卽日入衛城所運糧凡四千餘石軍民感泣呼聲震地進兵部尚書協理軍政尋復總督宣大軍務四十四年卒諡恭襄

張達涼州人目不識書慷慨負奇節膂力絕人嘉靖中充延綏遊擊將軍吉囊俺答大入山西達赴援數遇寇殺傷相當被圍嵐縣力戰得出累擢署都督僉事充山西總兵官駐寧武寇大入太原躡州縣三十八逮繫獄兵部尚書毛伯溫言達善撫士卒被逮之日部曲攀號如失慈母請令立功須後效不從二十三年給事中戴夢桂請釋達命赴軍前立功却敵鐵裹門後以總兵官鎮大同俺答入巡按御史胡宗憲趣戰達素勇敢好離營

繞鬪挺身陷陣寇圍數匝副總兵林椿援之胥戰歿贈左都督
諡忠剛立祠賜祭葬二子世傑世授血戰潰圍廕世指揮僉事
周尚文字彥章西安後衛人多謀畧精騎射襲指揮同知嘉靖中
起山西副總兵寇繇偏頭關趨岢嵐轉戰三百里破之與其子
君佐俱傷資銀幣二十一年秋又以總兵官鎮大同請增餉及
馬兵部議格之而尚文與巡撫趙錦不協乞休弗允御史王三
聘請移他鎮廷議大同敵衝尚文假此避耳乃移錦甘肅吉囊
數萬騎犯前衛有黑山涼城之捷晉右都督已寇繇宣府入出
大同塞而北尚文邀之稍有俘獲後寇復大舉犯鵝鴿峪將南
下尚文備陽和遣騎四出邀寇寇遁賜勅獎勞之總督翁萬達
大同縣志卷十三 宣績 十三

議築邊牆自宣府西陽和至大同開山口延袤二百餘里以屬
尚文乃益築陽和以西至山西了角山凡以百餘里敵臺千餘
斥屯田四萬餘頃益軍三千有奇上嘉其功晉左都督加太子
太保叛人充灼名小王子寇邊尚文偵得其使者加太保廕子
錦衣世千戶時諸邊歲受寇患大同尤甚自尚文蒞鎮與總督
萬達巡撫詹榮規畫戰守邊民息肩者數年尚文益招叛人孤
敵勢歸者相屬二十七年八月寇圍指揮顧相等於彌陀山出
援之解其圍又勝於野口而還旋以大同兵援宣府勝於曹家
庄錄功兼太子太傅賜資有加其年卒尚文得上死力善用間
故所向有功自二十年後俺答頻擾邊宿將王效馬永梁震皆

前卒惟尚文存威名最盛及卒嚴嵩父子格卹典不予穆宗初
贈太傅諡武襄

梁震新野人廉勇善訓士嘉靖中充陝西總兵官晉右都督十五
年移鎮大同大同卒數亂繼李瑾者魯綱威不振兵益驕廷議
以爲憂移震往震素蓄健兒五百人至則令軍中曰我無爾陵
爾無我叛健兒輩又時時恐喝鎮兵鎮兵素憚震繇是帖服寇
入犯震破之牛心山斬級百餘寇憤駐近邊伺隙時車駕祀山
陵震伏將士於諸路寇果入大破之宣寧灣又破之紅崖兒斬
獲甚衆晉左都督毛伯溫督師與震修鎮邊諸堡不數月功成
卒贈太子太保賜其家銀幣加贈太保諡武壯震前後百十戰

大同縣志

卷十三

宦績

十四

未嘗少挫時率健兒出塞却敵營及卒健兒無所歸守臣以聞
編之伍邊將猶得其力代震者祝雄遼東人自山西副總兵移
鎮大同雖被劾解職而以善撫士聞後鎮薊卒薊人祠之

岳懋陝西人嘉靖三十三年爲大同總兵官五月懋巡邊至青圪
塔陷伏中戰死指揮薛綦已奪圍出太息曰主將死我何用生
復陷陣死之贈懋左都督諡壯愍立祠綦亦贈廕祔享

鄭洛字萬秀安肅人嘉靖三十五年進士隆慶時爲山西叅政佐
總督王崇古劾俺答有功萬曆二年擢右僉都御史巡撫山西
移大同加右副都御史入爲兵部右侍郎七年以左侍郎總督
宣大山山西軍務昆都力子滿五大令銀定入犯洛奏停貢市遣

使責俺答罰贖駝馬牛羊乃復許款辛愛襲封三娘子率衆西走辛愛自追之洛遣人婉諭三娘子乃聽命歸辛愛貢市惟謹以功加兵部尚書兼右副都御史十四年擢力克當襲三娘子以年長自練兵萬人築城別居洛復婉諭擢力克遂妻三娘子嗣封并奏封忠順夫人定市馬數宣府不得踰三萬大同萬四千山西六千而申飭將吏嚴備以防盜竊且無輕過其部落馳獵者上嘉納之自太子少保累加至太子太保呂爲戎政尚書十八年洮河用兵詔兼右都御史經畧陝西延寧甘肅及宣大山西邊務時擢力克遺洛書以赴青海仰華寺爲名洛使從塞外行又諭忠順夫人曰彼中撫賞不能多且王家在東恐有內

大同縣志

卷上二

官績

五

顧憂也尋詔洛經畧七鎮擢力克與忠順夫人諭罪請歸洛進兵青海尚書石星以宣大事急請速召洛究款戰之計洛旣至與總督蕭大亨巡撫王世揚邢玠等上疏曰擢力克諉罪火洛亦真相桀驁之跡已歛且其部落數千里部長十餘輩在巢保疆者宣鎮則青把都兄弟未嘗東窺而兀慎擺腰五路之在新平馴服猶故在西行牧不他失未嘗窺莽刺捏工而大成比妓則又歸巢獨先今以一人之罪槩絕諸部消往日之恩開將來之隙臣未見其可今史二外背屢擾邊疆若令順義王縛獻以著信然後酌議市賞在我固未爲失策也議遂定尋加少保召理戎政順義王果縛史二來獻復款如故洛謝病歸卒贈太保

謚襄敏

馬芳字德馨蔚州人十歲爲寇所掠潛自亡歸周尚文鎮大同奇之署爲隊長數禦寇有功嘉靖二十九年授陽和衛總旗戰威遠斬級九十禦寇新平堡復有功無何戰泥河大破之累遷指揮僉事三十六年守宣府寇大入山西芳一日夜馳五百里及之七戰皆捷隆慶元年山西總兵申維岳等敗於石州伏誅而副將田世威叅將劉寶繫獄芳乞寢蔭子爲二將贖御史王沂劾之時大同被寇視宣府尤甚總督陳其學令總兵官趙尙扼紫荆關寇乃縱掠懷仁山陰間尙坐貶三秩遂調芳與易鎮俺答犯老營堡總兵郭琥堅壁待寇遂趨應朔芳亦嚴爲備乃西

大同縣志

卷十三

宦績

六

攻平虜城叅將張剛厚遺之令移犯威遠幾破會其學率胡鎮等救而芳軍亦至相距十餘日乃走芳謂諸將曰大同非宣府比與我間一牆耳寇不時至非大創之不可乃將兵出右衛戰威寧海子破之萬曆中卒芳戰朔州登鷹巢鴿子堂大沙灘暨宣鎮未嘗不大捷威名震邊陲爲一時將帥之冠

翁萬達字仁夫揭陽人嘉靖五年進士二十三年爲兵部右侍郎兼右僉都御史代翟鵬總督宣大山西保定軍務謹偵候明賞罰每當防秋發卒乘障陰遣卒傾硃於油察離次者硃其處卒歸輒縛毋敢復離次嚴殺降禁違輒抵死得降人撫之如所親以是益知敵情寇數萬騎犯大同中路入鐵裹門故總兵張達

力戰却之又犯鵝鴿峪叅將張鳳諸生王邦直等戰死萬達與
總兵官周尚文備陽和而遣騎四出邀擊屢有斬獲寇登山見
官兵大集乃引去事聞賜勅獎賚屢疏請修築邊牆議自大同
東路至宣府西陽河須帑銀二十九萬上已許之兵部以大同
舊有二邊可扼敵騎不當復於三邊內築牆上不聽乃自大同
東路天城陽和開山口諸地爲牆百二十八里堡七墩臺百五
十四而宣府亦爲牆六十里功五十餘日成晉右都御史發代
府宗室充灼等潛謀晉左都御史已會宣大山西鎮巡官議上
邊防修守事宜大畧謂先年山西防秋止守外邊比棄極衝守
次邊非守要意併守之議實爲善經因條上定規畫度工費二

者爲修邊之事慎防秋併兵力重責成量徵調實邊堡明出塞
計供億節財用八者爲守邊之事上悉報許乃請帑銀六十萬
兩修大同東路宣府西路邊牆凡八百里工成予一子官萬達
精心計善鈎校牆堞近遠壕塹深廣曲盡其宜寇乃不敢輕犯
牆內戍者得以暇耕牧邊費亦日省初客兵防秋歲帑金一百
五十餘萬添發且數十萬其後減省幾半又議掣山西兵併力
守大同巡撫孫繼魯阻之上爲逮繼魯萬達更事久上深倚之
所請無不從獨俺答貢事石天爵款鎮邊堡業爲巡撫龍大有
所嫉信使絕五年會玉林衛百戶楊威被掠復遣使偕威款大
同左衛塞邊帥家丁董寶等狂天爵前事殺之萬達言北敵宏

治前歲入貢疆場稍寧自虞臺嶺之戰覆我師侵犯四十餘年
石天爵之事臣嘗痛邊臣失計今復通款即不許當善詞諭遣
誘而殺之此何理也請亟誅寶等榜塞上明告以朝廷德意解
其蓄怨構兵之謀不聽既而復奉印信番文詣邊萬達又言臣
等封疆臣貢亦備不貢亦備兵部尚書陳經請責萬達十日內
回奏而使適未至尋李天爵復至詞益恭萬達又言今宣大興
版築正當羈縻使無擾請限以地以人以時上責其瀆奏率不
許時曾銑議復套夏言主之故力結貢議萬達復議套功難成
不省二十七年三月又言諸部求貢不遂慚且憤聲言大舉上
切責之通貢議乃絕八月俺答犯大同不克退攻五堡官軍戰
大同縣志

卷十三

臣績

六

彌陀山却之趨山西復敗還尋以宣撫曹家庄功晉兵部尚書
兼右副都御史召理部事艱歸卒隆慶中謚襄毅萬達臨陣嘗
身先士卒尤善御將士得其死力嘉靖時邊臣行事適機宜建
言中肯欵者萬達稱首

方逢時字行之嘉魚人嘉靖二十年進士隆慶四年正月爲右僉
都御史巡撫大同俺答入威遠堡別部攻靖魯伏兵却之冬俺
答孫把漢那吉來降告總督王崇古曰機不可失也遣中軍康
綸率騎五百往受之與崇古定計挾把漢以索叛人趙全等遣
百戶鮑崇德出雲石堡語俺答部下五奴柱曰欲還把漢則速
納欵若以兵來是速之死矣五奴柱白俺答邀入營說以執趙

全易把漢俺答心動遣火力赤致書逢時而是時全方從與用兵俺答合子辛愛將二萬騎入宏賜堡兄子永邵卜趨威遠堡自率衆犯平虜城逢時曰此必越全謀也全嘗投書逢時言悔禍思漢欲復歸逢時以示俺答俺答大驚有執全意及戰又不利乃引退辛愛猶未知奄至大同逢時使人持把漢箭示之曰吾已與而父約以報汝辛愛執箭泣曰此吾弟鐵背台吉故物也我來求把漢把漢既受官又有成約當更計之乃遣部下啞都善入見逢時曉以大義犒而遣之辛愛喜因使求幣逢時笑曰台吉豪傑也若納款方重加爵賞何愛此區區損盛名辛愛大慙復遣啞都善來謝曰蒙太師教幸甚故將田世威亦讓其

大同縣志

卷十三

宦績

九

使使還報俺答名辛愛還東行宣府總兵趙崑過之復繇大同北去巡按御史姚繼可劾逢時輒通寇使屏人語導之東行嫁禍鄰鎮大學士高拱曰撫臣臨機設策何可洩也但當觀後效不宜先事輒易上然之俺答乃遣使定約夜召全等計事卽帳中縛送大同逢時受之崇古亦送把漢歸逢時以功晉兵部右侍郎兼右僉都御史甫拜命以憂歸後崇古入理京營神宗問誰可代者大學士張居正以逢時對萬厯初起故官總督宣大山西軍務始逢時與崇古共決大計而貢市之議崇古獨成之逢時復代崇古乃申明約信二人首尾共濟邊境遂安累晉兵部尚書兼右都御史總督如故加太子少保五年召理戎政復

列上五事又上款貢圖等爲兵部尚書累加少保致仕卒逢時功名與崇古相亞時稱方王

王崇古字學甫蒲州人嘉靖二十年進士喜談兵具知諸邊阨塞隆慶四年正月總督宣大山西軍務禁邊卒闌出而縱其素通寇者深入爲間又檄勞番漢陷寇軍民率衆降及自拔者悉存撫之歸者接踵西番剋黃毛諸種一歲中降者踰二千人冬十月俺答孫把漢那吉來降留之大同慰藉甚至詔授指揮使賜緋衣一襲許俺答互市遂縛叛人趙全等以獻加太子少保兵部尚書遂定封俺答順義王昆都力辛愛吉能等授官有差崇古乃廣召商販聽令貿易布帛菽粟皮革遠自江淮湖廣輻

大同縣志

卷十三

宦績

三

輳塞下因收其稅以充犒賞其大小部長則官給金繒歲市馬各有數崇古仍歲詣宏賜堡宣諭威德諸部羅拜無敢譁自是邊境休息東起遵永西抵嘉峪七鎮數千里軍民樂業不用兵革詔晉太子太保萬曆初召理戎政加少保晉兵部尚書致仕卒贈太保謚襄毅崇古獨任貢市貽五十年太平之福海宇內外胥頌社稷臣爲宣大總制冠

劉祐字淑修號拙齋東萊掖人嘉靖癸丑進士由司理累擢都察院右僉都御史巡撫大同大同爲九邊要害地去寇最近俺答吉囊方相繼深入陷石州屠昌黎塞下岌岌咸爲祐難之祐諷咨利害得其要領謂雲中西聯東勝東接右衛聲勢連絡自一

邊失守以險予敵五堡之役復以兵亂不終遂孤懸不支宜乘時聚落番休控險成犄角之勢漸復五堡援右衛屯田訓士且戰且守庶有寧宇於是相地形增亭障稽覈耗漏率勵勇敢戒諸將各守分地毋輕出塞邊政大舉寇不得利引去間一入寇督兵禦之俘斬數百奪馬牛羊千數捷聞賜白金文綺陞俸一級寇自是稍挫其部落多來降祐疏請便宜處置千人以上則爵其魁游徼卒敢遮掠者罪制曰可當是時微祐雲中幾殆然祐治軍嚴諸統袴子弟不得竄籍冒功遂騰蜚語祐亦以念母甚移疾乞歸時年四十三

劉漢平魯衛人嘉靖三十九年任大同總兵官叛人邱福趙全李

大同縣志

卷十三

宦績

三

自馨等居古豐州築城建墩構宮殿甚麗號曰板升時鎮兵積弱漢憤甚謀選精銳襲之斬八十三級生擒七十二人焚其宮室餘衆奔匿幾獲全捷聞上大悅漢等陞賞有差

郭琥字宗器永昌衛人繇總旗積首功隆慶時爲大同副總兵又任山西尋代馬芳鎮大同以貢市功累晉右都督萬曆十一年以老乞休晉都督致仕卒琥與趙尙皆宿將知名琥潔廉好等畫識軍進止

王公象雲爲立功德碑見藝文

曾乾亨字於健吉水人同亨之弟也萬曆五年進士歷光祿寺卿十八年冬勅兼監察御史閱視大同邊務劾罷總兵官以下十餘人大同土兵歲餉萬二千石兵自徵之民不勝擾乾亨請留

兵二百餘盡汰之屢奏邊備事宜輒中機要晉大理少卿歸卒
張宗衡臨清人萬曆四十一年進士天啟七年五月為右僉都御
史代張翼明巡撫大同引宿將滿桂為助大修邊防時虎墩兔
議順義故時額賞起王象乾督宣大令任欵事象乾定撫議宗
衡初與同議後力言宜戰不宜欵檄總兵王牧民副使宋統殷
閉不許通市乃上疏曰自插部駐歸化城去大同僅三百里間
時三月未敢近大同一步我固無如插何插亦無如我何則以
饑寒窮困插與我不異爾插賴撫賞為命兩載不領資用已竭
加以巢穴未定半懷攜貳東西馳驅勞頓已甚其駐牧處草根
皆盡馬瘦如柴暴骨成莽屢索我迎風諸禮望欵不啻望歲而

大同縣志卷十三 宦績

我墮其計中厚遺以金繒牛羊米粟諸物是插本窮而我固富
之插本弱而我固強之我有利不得自利又轉以為插利豈不
痛哉使彼有纖毫懷德之意猶之可也乃往來講議其咆哮之
狀悖慢之辭至不忍聞彼窮餒猶如此草青馬肥憑陵狂逞可
勝道哉臣謂惟此時可以圖插幸聖明速決上報曰宗衡既知
欵不足特當實圖戰守無取空言象乾疏請專任撫臣上乃責
宗衡先後異議兵科給事中陶崇道復力駁之宗衡再疏曰插
賞新者八萬一千加以馬價大同兩年二十四萬山西兩年十
萬宣府十八萬遼東兩年四十萬共百萬矣當此三空四盡之
秋忽舉百萬以欵敵臣實不解謂不欵能患我耶臣抵大同九

月矣未嘗談一欸字彼亦未敢近邊謂借欸方可修備也臣方造火砲演車陣整器械葺邊垣何嘗一日不修備彼亦何能禁我之不修以插之疲甚饑甚困窮甚忽睹此百萬金錢一去而不返也臣安得不痛憤乎撫敵何如撫士資寇何如滅寇臣揣時度勢計當如此而時局不容請賜罷斥象乾亦再疏陳利害兵部尚書王洽言宣府二十三萬大同十二萬山西五萬合之四十餘萬乃俘馬價所謂互市也又奏宗衡議戰欲得京營馬萬五千火器三萬計一馬費二十金當三十萬一火器費三十金當九十萬此百二十萬安能驟應宗衡但知插部饑疲不知自吞併諸部人馬衆盛卽戰亦豈能必勝後竟如象乾議宗衡

抗疏力辨詆象乾專任王牧民之非且求罷斥不允四年春魏雲中罷擢宗衡兵部右侍郎代之五年五月得勝堡幾失與巡撫張廷拱並鑄級視事監視中官劉允中極陳殘破狀叅議王則古疏白其誣乃不問時綏寇入山西部議宗衡移駐平陽統虎大威李舉賀人龍左良玉諸將兵以平陽澤潞四十一州縣屬之巡撫許鼎臣駐汾州統張應昌苟伏威頗希救艾萬年諸將兵以汾太沁遼三十七州縣屬之宗衡聞命卽提陽和兵從澤州尾賊至陵川勝之再敗賊潞安之西火斬級二千連戰陽城之陽泉沁水之毛連溝鹿臺寺石塔杏谷並破之俘斬皆千人已卑人龍萬年以關中兵至鼎臣檄從已宗衡怒檄三將還

賊遂轉入磨盤山乘間從武鄉陷遼州宗衡強起舊帥尤世祿使率人龍卑赴援六年正月復其城會秦將曹文詔至與猛如虎屢破賊賊漸衰時張應昌任山西總兵五檄之不至怒而言於朝俄以賊窺河北乞勅山西撫鎮率卑萬年馳勦毋以臣爲孤注語多侵鼎臣鼎臣亦劾宗衡所舉監軍主事李蔡會賊果入河北宗衡乃還陽和時虎墩免遠竄部下無所歸多叩關乞降宗衡受之安輯者萬二千餘人大同自是無插部患七年五月惇縣靈邱諸城堡多破命戴罪視事旋命盡督諸鎮援軍而援將吳襄尤世威等皆不至九月論罪謫戍十五年臨清破死於兵予卹典

大同縣志

卷十三

宦績

二

焦源溥字涵一三原人萬曆四十一年進士崇正二年爲分巡河東道副使預平大盜王嘉印遷寧武叅政再有平寇功就還山西按察使七年擢右僉都御史巡撫大同時兵缺餉乏歲浹饑民無糠粃亟請蠲賑且增兵餉當事不能應踰年遂自劾求去監視中官魏國徵撫論其不職坐罷歸十六年爲流賊拔舌支解死

盧象昇字建斗宜興人少讀張巡岳飛傳輒歎息曰吾得爲斯人足矣舉天啟二年進士崇正八年八月總理江北河南山東湖廣四川軍務尋晉兵部侍郎加督山西陝西軍務賜尚方劍便宜行事殲流寇幾盡九年九月宣大總兵梁廷棟卒遷兵部左

侍郎總督宣大山西軍務宣大素苦缺餉乃大興屯利行二年積穀至二十萬上諭九邊奉以爲式十一年三月以生辰方舉觴侑客謀報西部乞炭台吉數萬騎入邊求市卽夜督兵出羊房口尅期決戰乞炭解去越二月外艱廷議奪情留任四疏懇請上哀之特起陳新甲制中令象昇候代新甲家四川未上乃墨緣從事尋晉兵部尚書九月督山西總兵楊國柱王樸虎大威諸軍入援十二月朔殉節贈太子少師兵部尚書

衛景瑗字仲玉韓城人天啟五年進士崇正十五年二月爲右僉都御史巡撫大同歲饑且疫疏乞賑濟給牛種民獲甦乃戢豪宗蒐軍實練火器聲績甚著十七年正月李自成將犯山西宣

大同縣志

卷十三

宦績

三五

大總督王繼謨檄大同總兵姜瓖扼之河上瓖潛遣部將李時華納款而還景瑗不知也及山西陷邀瓖歃血誓死守瓖布訛言衛巡撫秦八將應賊代王果疑之不與相見永慶王至射殺其僕會景瑗有足疾不時出兵事皆瓖主之瓖兄瑄以昌平總兵失律繫獄後赦出就瓖力勸降賊瓖虞卒不從人犒銀數兩不足則予布帛佯言勵將士固守王及士民咸信之諸郡王分守城門瓖每門遣卒二百助守至三月朔賊抵城下瓖卽射殺永慶王開西門迎賊使人詐要景瑗議事景瑗乘馬出知有變自墜馬下俄爲賊所執見自成自成欲官之景瑗不屈據地坐大呼莊烈帝而哭賊義之曰忠臣也不殺景瑗猝起以頭觸階

石血淋漓賊引出顧見孺罵曰反賊與我盟而卽叛神其赦汝
耶賊使景瑗母勸景瑗降景瑗曰母今年八十餘當自爲計兒
國大臣不可不死母出景瑗謂人曰吾不罵賊者以全母也六
日自經於僧寺賊歎爲忠臣移妻子空舍戒無犯

焦源清字湛一三原人源溥之從兄也萬曆中進士歷山西右布
政使擢巡撫宣府後爲賊執不食死

徐有聲字聞復金壇人登鄉薦以戶部郎中督餉大同十七年李
自成陷城不屈死

朱家仕河州人進士崇正末爲分巡陽和兵備副使寬平慈和博
學通內典聞賊入大同或爲謀他出可以後圖家仕笑曰時事

大同縣志

卷十三

宦績

三

至此余生平參驗謂何而惜一死以報君父耶盡驅妻妾子女
入井自抱金菩提一尊投入其從容如此

張肇斌順治五年任大同府西路同知姜逆之變以死事著

佟養升遼東人順治間以旗職養馬大同姜逆之變巷戰不屈死
管一舉順治間任得勝路叅將死姜逆之變 贈副將祀忠烈祠

宋子玉遼東人順治間任大同兵備道姜逆之變與通判楊達朔
州知州王家珍謀靖其患旣而謀不克遂因手刃愛子以死

徐一范江南蕪湖人以進士任禮部郎中轉大同兵備道時業知
姜壤變私念猶子明弼知馬邑縣可藉以殺賊驅車直前不少
沮比至城下傷於撻蓋賊黨還匝一范固無由察也至死罵不

絕口

彭有德遼東人順治間任大同右衛叅將姜瓖之變抗節不從賊勢甚熾有德力禦不支單騎潰圍投親王帳家人六十餘口皆遇害賊平論勦撫功擢授大同總兵蒞鎮宣布威德和輯兵民修築城堡橋梁廢墜漸舉康熙三年歲饑有德率先捐俸以賑全活甚衆軍民頌德不朽祀名宦

佟養量字滄涵正藍旗人由佐領積功累加至輕車都尉順治六年擢兵部左侍郎兼右副都御史總督宣大山西軍務駐劄陽和時姜逆初平骨骸遍野爲斂而葬之又建報忠祠祀一時死事者嘗錄重囚有張發者業斃於獄矣其族牽連多論死檢原

大同縣志

卷十三

宦績

三七

案復視特爲省釋內丁揚洲玉寓齊生所獲藏鏹八百兩呼其子弟至悉畀之修學宮習禮教射其中會部議衛所屯田照內地民田例起科養量疏言邊地種遲霜早沙磧相望加以兵旅之餘荒殘愈甚若必援例起科勢必聞風俱潰夫有人斯有財益下卽益上疏上

俞允雲中人至今祠祀之

曹溶字秋岳浙江嘉興人康熙六年任大同兵備道學問閎博處兵瑣瘡痍間賑荒馭吏胥有績雅稱歎徐明經化溥馮觀察雲驥才亟旌之時學政叢弊溶箝制俾不敢逞魏敏果象樞雅叅議焉尋以裁缺去仕至侍郎

馬呈書廣平人嘉靖中以鄉科起家任縣事饒才華善剖決民以
訟至者立判之稱神君秩滿擢本府同知督府倚重入爲郎中
尋復出知大同府鎮撫有方尤加意學校三雲軍馬間絃誦時
聞擢運使致仕歸
士民德之陞御史

呂坤字叔簡寧陵人萬曆二年進士由襄垣縣調任縣事多惠政
善斷疑獄民德之如父母嘗作公署左右二銘泐石在官者良
箴也今箱廳事壁間又自書門聯曰皇天下鑒此心敢不光明
正直赤子來遊吾腹願言愷悌慈祥真不愧斯語徵授戶部主

大同縣志

卷十三

宦績

二十六

事游陞山西巡撫道光六年從祀 文廟

解經邦韓城人萬曆乙未進士任縣事端介不苟代府宗人頗豪
橫好持吏短長爲民害經邦以禮繩束之卒不敢干以私累遷
陽和兵備副使風紀肅然後至宣府巡撫

孫體元山東濱州人萬曆間以進士任縣事下車卽慨歎學宮闕
畧首捐俸鳩工鑿泮池建奎光樓規制一新久之陞工部主事
去士民思之

關揚海豐人萬曆壬辰進士任縣事嘗苦郵驛罷徹令將驛糧隨
大糧徵入官庫以見銀鬻驛僱役人樂趨焉又起房課分上中
下三等官覓人役民獲寧止

李應薦恩縣人萬曆癸丑進士任縣事闢荒田清糧額設兵備捍衛有功尤善決疑獄堂規肅然吏胥無敢為姦利者去之日攀留載道民久而思之

王象雲山東新城人天啟五年進士任縣事下車卽列上條議民風邊政如指掌頻歲旱潦多荒地象雲給牛代種以招撫之又捍衛守禦有功擢御史官至山西叅議

王宗文龍游人崇正間以貢任本縣縣丞佐縣令固守南關脩著勞績又嘗督運粟米採買硝磺公事濟而下無派累其清勤尤足多云

馬剛中字九如商城人崇正七年進士除授任縣事豐儀善譚論

大同縣志

卷十三

宦績

二十九

雅重學校喜與士大夫講文義治尚寬平行取授檢討乞假歸

里城陷死

按明史商城知縣盛以恒與鄉官洪允衡馬剛中等守城死

王度山東泰安州人順治三年以進士任縣事精練明敏治有聲

姜逆之變道府篆多失獨縣印存 親王統師來討時平西將

軍印猶未頒布檄徵餉調兵緊縣印是賴度善招撫懷仁諸地以次定督運勸輸搜馬擒賊胥有功賊黨忌其能造度手書投營前爲反間 王知其僕忠出書示之度勃怒檄詆賊家人九口胥爲賊所害事平議敘歷官至太常寺卿

項一科順治四年任縣丞有能聲姜逆之變以死勤事

孔化鳳山東恩縣人順治十四年由拔貢任縣事性廉介嚴明查

廢產清隱占讞獄平恕催徵有方胥役不敢犯科而閭閻德之
至修文廟建橋樑一時政績多可紀述

以上自馬呈書至此共十三人蓋令丞之有循聲已見於府
省二志者茲續以新錄共為一編

虔禮寶字律齋滿洲人由高平調任有幹才興廢舉墜時邑中學
宮坍敗毅然修之縣治將不蔽風雨俱力為營建然絕科派不
以累民以此見重一時薦擢太原府知府後官至方伯

傅修字竹猗海陽人乾隆壬午舉人以大挑宰山陰遂調知邑事
時東關河勢西移將不利於城郭慨然曰名山大澤必有神以
主之諸侯祭封內山川以祈民也即建祠於河干祀維謹患始

大同縣志

卷十三

宦績

三

息西鄉有泉利灌溉名以養取井養之義泉記祠碑俱刻藝文
志秩滿膺卓薦擢直隸磁州牧薦陞按察司調山西按察宰大
同時隣邑有男子道斃不知為誰何所傷修奉檄往代驗度其
地無居民惟數里外有窰累累急掩捕果得正克凡疑獄之不
結者無不一鞠而定事多類此

吳逢聖桐城人乾隆五十二年歲大祲赤地千里惟大同尤荒人
相食大吏惶急無措時吳久已調繁平遙循聲素著求能撫綏
大同者非吳不可乃檄吳來攝邑篆下車日覽邑境五百八十
餘村而城中比櫛皆居民生齒之繁甲於三晉土薄地寒素鮮
貯藏值此室如懸磬哀鴻遍野綏輯之難未有甚於此者吳措

置有方緩急可倚其間勸捐助賑設厰移粟諸務能於古人荒政之外獨出心裁故拯於水火之中而登於衽席之上萬家赤子皆以生佛事之今尚口碑弗衰凡署篆者例不登於邑乘吳之救荒其德之及人者深故書之以告後人

余昌祖字念齋湖南臨湘人乾隆六十年任曩時有火藥轉運需車輛最多且責令長途專賫久爲商民病昌祖爲詳請憲府遞站撥送以均苦樂一時稱便歌頌勿衰以秩滿遷士民遮道攀轅建置生祠以泐甘棠之咏

張儲字裕山陝西潼關廳人嘉慶五年任古雅儉樸無赫赫名然捐館之日弔奠者盈門祖餞者遍野皆平日非公不至者也昔

大同縣志

卷十三

宦績

三

朱邑爲桐鄉令遺言必葬桐鄉桐鄉之民爲立祠以今觀之何嘗不逮古人也哉

劉斯裕字芝厓南豐人戊辰進士嘉慶十九年任善決獄名譽甚著上官廉知其能調省會首邑自中丞藩臬以下皆倚重之以報最擢霍州牧未幾簡放大同府未及之念卽奉

特旨調太原府甫兩月卒於官時論惜之